

Na osnovu člana 48. stav 2. i člana 58. stav 2. Zakona o upravljanju otpadom ("Službene novine Federacije BiH", broj 33/03), Vlada Federacije Bosne i Hercegovine donosi

UREDBU

O OBAVEZI DOSTAVLJANJA GODIŠNJEG IZVJEŠTAJA O ISPUNJENJU UVJETA IZ DOZVOLE ZA UPRAVLJANJE OTPADOM

Član 1.

Ovom Uredbom propisuje se sadržaj godišnjeg izvještaja o ispunjenju uvjeta iz dozvole za upravljanje otpadom ili okolinske dozvole izdate za upravljanje otpadom (u daljnjem tekstu: dozvole) i drugim podacima.

Član 2.

Proizvođači otpada i operatori postrojenja ili pogona za tretman otpada, kojima je izdata dozvola dužni su nadležnom organu koji je izdao dozvolu (u daljnjem tekstu: nadležni organ) dostaviti godišnji izvještaj o ispunjenju uvjeta iz dozvole do 31. marta naredne godine za prethodnu godinu.

Član 3.

Godišnji izvještaj o ispunjenju uvjeta iz dozvole sadrži minimalno slijedeće podatke:

1) o podnosiocu izvještaja:

- ime i prezime odgovorne osobe,
- naziv preduzeća,
- adresa pogona ili postrojenja,
- broj i datum izdavanja dozvole,
- za deponije otpada i finansijske garancije za pokrivanje troškova rizika od mogućih šteta, čišćenje i postupke nakon eventualnog zatvaranja pogona, raspoloživih 31. decembra tekuće godine za koju se izvještaj dostavlja; kao dokaz priložiti izvod bankovnog računa, potvrdu o važećem sklopljenom ugovoru o osiguranju ili drugi dokaz,
- datum dostavljanja izvještaja;

2) vrste i ukupne količine otpada po kategorijama (sa kodovima u skladu s Pravilnikom o kategorijama otpada sa listama) proizvedenog ili tretiranog u toku protekle godine,

3) ulazno-izlazni bilans pojedinih otpadnih materijala po mjesecima (ne odnosi se na proizvođače otpada),

4) o porijeklu i daljem odredištu otpada po mjesecima (u slučaju deponije samo navesti porijeklo, a proizvođači otpada trebaju navesti samo dalje odredište),

5) sažete izvještaje o provedenim kontrolama u toku godine (datumi, podaci o izvršiocima kontrola, sažeti nalazi kontrola, detalji o bilo kakvim znatnim negativnim nalazima i usvojenim rješenjima za otklanjanje nepravilnosti),

6) o promjenama u odnosu na uvjete iz izdate dozvole u vezi sa:

- metodama tretmana otpada,
- brojem uposlenih i njihovoj stručnoj osposobljenosti,
- načinu ili režimu rada (broj smjena, dužina trajanja smjena, rad za vrijeme vikenda),
- novim objektima na lokaciji pogona ili postrojenja,
- ogradom, kapijom oko pogona ili postrojenja,
- prilaznim putevima,
- novom opremom ili uređajima,
- lokacijama prikupljanja ili preuzimanja ulaznog materijala, u slučaju da se taj materijal ne preuzima na lokaciji samog postrojenja za obradu ili zbrinjavanje;

7) o ostalim promjenama:

- vodoinstalaterski radovi unutar pogona/postrojenja ili u njegovoj neposrednoj blizini,
- radovi na kanalizacionoj mreži unutar pogona/postrojenja ili u njegovoj neposrednoj blizini,
- elektro-radovi unutar pogona/postrojenja,
- podaci o drugim značajnim infrastrukturnim promjenama;

8) o kvarovima na uređajima/opremi, te o tome da li su takvi uređaji/oprema popravljani ili zamijenjeni;

9) o nezgodama, prosipanju tečnosti, požarima, poplavama na lokaciji pogona/postrojenja i/ili u njegovoj okolini;

10) o bilo kakvim masovnim oboljenjima ljudi ili životinja u okruženju;

11) o broju i vrsti pritužbi okolnog stanovništva;

12) o obustavama rada postrojenja dužim od 7 dana;

13) uočene promjene ili nepravilnosti u vezi ulaznog otpada - promjene kvaliteta i sl. (ne odnosi se na proizvođače otpada);

14) o otpadu skladištenom duže od 12 mjeseci (tretiranom ili netretiranom otpadu - vrste, količine i razlozi izostanka tretmana, način i mjesto skladištenja - skladištenje na otvorenom ili skladištenje u zatvorenom/natkrivenom prostoru, skladištenje na betoniranoj podlozi ili na nebetoniranom tlu).

U slučaju odstupanja od uvjeta iz dozvole, potrebno je posebno za svaku kategoriju ponaosob obrazložiti uzroke odstupanja.

Član 4.

Godišnji izvještaj o ispunjenju uvjeta iz dozvole dostavlja se nadležnom organu na obrascu-formularu koji se nalazi u prilogu ove Uredbe.

Član 5.

Nakon prijema i preliminarog pregleda godišnjeg izvještaja o ispunjenju uvjeta iz dozvole nadležni organ može dodatno zahtijevati dostavljanje podataka o:

- potrošenim energentima u toku protekle godine (struja, lož - ulje, čvrsto gorivo, gas)
- potrošenim pomoćnim sredstvima (maziva, rashladne tečnosti i sl.) u toku protekle godine.

Član 6.

Primjerak godišnjeg izvještaja o ispunjenju uvjeta iz dozvole dostavlja se inspektoru zaštite okoliša.

Dostavljeni podaci iz godišnjeg izvještaja o ispunjenju uvjeta iz dozvole unose se u bazu podataka nadležnog organa.

Član 7.

Ova Uredba stupa na snagu osmog dana od dana objavljivanja u "Službenim novinama Federacije BiH".

V 262/06
25. maja/svibnja 2006. godine
Sarajevo

Premijer
dr. **Ahmet Hadžipašić**, s. r.